

«Nagins indizis da privels concrets»

Tavau: 50avel Forum mundial d'economia

DA GION NUTEGN STGIER / FMR

■ **Da la partida tranter ils 3000 visitaders da l'occurrènz internaziunala èn er 120 persunas da num e pum. Quellas personalitads han il dretg d'in schurmetg personal. La segirezza custa nov milliuns francs.** Dapi il 1971 stat Tavau il mais da schaner en il center da la politica internaziunala cun avair lieu il Forum mundial d'economia. A partir dad oz fin sonda tschertgan numerus schefs da stadis, rotschas da ministers, personalitads da l'economia, da la scienza e da la cultura soluziuns per meglierar il mund. Tranter la blera prominènz politica sa chattan er vers 120 uschenumnads «VIP's» ch'han il dretg d'in schurmetg personal. Polizia ed armada segnan per la segirezza da las persunas da num e da pum, dentant er per la segirtad da tuts ils auters participants dal Forum mundial d'economia ed er per la populaziun da Tavau ed ils blers auters giasts. La collavuraziun tranter la polizia ed il militar saja dapi onns exemplarica, ha ditg ier *Walter Schlegel*, il cumandant da la polizia chantunala e schef da l'entira segirezza tar il Forum mundial d'economia.

Dapi tschintg onns in pli grond privel

Schlegel discurra bain d'in tschert privel tar la 50avla ediziun dal Forum mundial d'economia, però betg dad indizis concrets. Dapi il 2015 saja il privel s'augmentà ferm e sin fundament da quella raschun hajan la polizia e l'armada adattà dad onn tar onn il dispositiv da segirezza. El ha ditg che da quintar sajan demonstraziuns er en pliras citads da la



Segnan responsabels per la direcziun da la segirezza tar il Forum mundial d'economia: cumandant da corp Aldo C. Schellenberg, colonel Walter Schlegel, superiur, e Stefan Blättler, president dals corps da polizia chantunals (da san.).

FOTO G. N. STGIER

Svizra sco er a Tavau. Gist perquai saja la preschientscha da la polizia en tut la Svizra pli gronda dad oz fin sonda proxima. Fin ussa sajan dentant las demonstraziuns stadis quietas, d'ina buna tenuta e cun disciplina, ha punctuà Schlegel.

Trump e passa 6000 autras persunas

Il dispositiv da segirezza saja bain in pau pli grond sche *Donald Trump* vegnia a Tavau, ha menziunà Schlegel. El haja però sez gia ina gronda guardia personala. Tar mintga personalitad che vegnia al Forum mundial d'economia cumenza il dispositiv da segirtad en quel mument che l'aviun sa platga a Turitg ubain sin in'otra piazza aviatica fin che mintgin saja a Tavau.

Schlegel ha menziunà che la segirezza custa bunamain nov milliuns francs. Per quels custs sajan la confederaziun, il chantun, ils organisaturs da l'occurrènz ed er la vischnanca da Tavau responsabels. El ha er ditg ch'en in di gjajan en ed or dal Center da congress a Tavau passa 6000 persunas. A Tavau existan durant il Forum mundial d'economia intginas zonas cun ina segirtad superiura. Quai èn il Center da congress, intgins hotels da tschintg stails e la piazza aviatica temporara en il nord da Tavau. Quella stat a disposiziun a helicopters da l'armada, da la polizia ed a helicopters privats. Sche l'aura saja bella, alura sa platgan e partan da Tavau fin 500 helicopters durant il Forum mundial d'economia.

In normal curs da repetiziun

Sustegnida vegn la polizia ferm da l'armada svizra cun ina truppa da vers 4200 schuldads e da quels n'èn 93% betg schuldads da professiun. Sco ch'il cumandant da corp, *Aldo C. Schellenberg*, ha ditg saja l'obligaziun principala da l'armada cunzunt da controllar il spazi da sgular enturn Tavau (46 km), il traffic aviatic e lura er da sgular cun helicopters las personalitads internaziunals da Turitg e da Dübendorf a Tavau. Fin a Turitg e Dübendorf vegnan las persunas prominentas cun lur agens jets privats. A Dübendorf hajan passa 40 jets plazs quels dis da l'occurrènz politica en il Grischun. In ulteriur pensum da l'armada èn er il schurmetg da numerus objects a Tavau ed il schurmetg da persunas.

Las truppas che prestan servetsch durant il Forum mundial d'economia prestan in curs da repetiziun regular ed ils custs da quels curs sajan enturn 32 milliuns francs, gia budgetads en il preventiv da l'armada.

In pèr cifras

Per il Forum mundial d'economia è il militar dependent da blier material e da numerus vehichels. Quai èn:

800 elements da saiv (50 km)
700 tgeiels da molan
500 glischs spezialas
460 camiuns/Duros
980 autos da persunas e bus pitschens
140 giadas vegnan en acziun chauns pervia da material explosiv.